

Messadi davart la revisiun parziala dalla lescha da taglia dalla vischnaunca Ilanz/Glion

Preziau signur president dil parlament
Preziadas parlamentarias, preziai parlamentararis

Egl art. 5 dalla lescha da taglia ei la tariffa da taglia per la taglia sin immobilias fixada. Quella schai per la vischnaunca dapi la fusiun tier 1 promil. Questa tariffa da taglia muntava per las biaras anteriuras vischnauncas in sbassament massiv, pertgei cun excepziun dil marcau da Glion e treis ulteriuras vischnauncas, che havevan medemamein ina taglia sin immobilias dad 1 promil, havevan tut las autras vischnauncas ina pli aulta tariffa (1.5 tochen 2 promils).

Co demussau ella rama dil messadi tier il preventiv communal 2019 ein per contonscher finanzas ulivas a vesta media sper in efficient tractament el menaschi, mesiras da spargn, in'eventuala reducziun dallas prestaziuns e renunzias d'investiziuns era entradas supplementaras necessarias. Mo ensemen cun entradas supplementaras vegnan las sfidas futuras tier las infrastructuras ad esser surventscheivlas (mira plan da finanzas investiziuns 2020–2024). Momentan sa la vischnaunca mo financiar la mesadad dallas investiziuns cun agens mieds. Senza cuntermesiras crescha la resca d'in augment dalla debitaziun ni d'ina bloccada d'investiziuns che impedess in saun svilup dalla vischnaunca.

La suprastanza communal ha intercurriu diversas variantas silla vart d'entradas. In alzament dil pei da taglia communal sin 110 pertschien (+ 900'000 francs entradas supplementaras) vesa la suprastanza communal momentan buca sco acceptabel per la maioridad. Era ina varianta cun alzar il pei da taglia communal sin 105 pertschien e simultanamein alzar la taglia sin immobilias per 0.25 promils sin 1.25 promils ha la suprastanza examinau, denton refusau. Daferton propona ella d'alzar sulettamein la taglia sin immobilias per 0.5 promils sin 1.5 promils. Quei augment muntass entradas supplementaras da bien 600'000 francs.

Exempels per taglias sin immobilias ella vischnaunca Ilanz/Glion actualas, contribuziuns annualas:

Persunas giuridicas:	1.00 promil	1.50 promils
Gronda casa da fatschenta,	frs. 9'000	frs. 13'500
Pintga casa da fatschenta,	frs. 900	frs. 1'350
Luvratori grond,	frs. 3'000	frs. 4'500
Luvratori pign,	frs. 1'165	frs. 1'748
Persunas naturalas:		
Gronda casa d'ina famiglia,	frs. 550	frs. 825
Pintga casa d'ina famiglia,	frs. 388	frs. 582
Gronda casa da vacanzas,	frs. 550	frs. 825
Pintga casa da vacanzas,	frs. 260	frs. 390

Per cumparegliaziun: Las vischnauncas en Surselva han las suandontas tariffas da taglia (en clamra il pei da taglia dalla vischnaunca):

Breil/Brigels	1.70 ‰	(100 %)
Mustér	1.70 ‰	(120 %)
Falera	1.25 ‰	(75 %)
Laax	1.00 ‰	(50 %)
Lumnezia	1.50 ‰	(105 %)
Medel/Lucmagn	1.50 ‰	(70 %)
Sursaissa Mundaun	1.50 ‰	(100 %)
Stussavgia	1.70 ‰	(105 %)
Sagogn	1.50 ‰	(112 %)
Schluein	1.50 ‰	(85 %)
Sumvitg	1.30 ‰	(105 %)
Trun	1.50 ‰	(105 %)
Tujetsch	1.50 ‰	(95 %)
Val	1.00 ‰	(100 %)

La gliesta demuossa claramain che las entradas dils tscheins d’aua possibiliteschan per l’ina allas vischnauncas da tener bass il pei da taglia. La vischnaunca Ilanz/Glion ha era tscheins d’aua (2017: 1.44 milliuns francs), en relaziun cun ils habitonts ein quellas entradas en cumparegliaziun denton mudestas (ca. 300 francs per habitont). Per l’altra ein tier las taglias sin immobilias las secundas habitaziuns e casas da vacanzas in factur. Ina gronda cumpart da secundas habitaziuns munta surproporzional biaras immobilias ed entradas correspudentas. Ad entginas vischnauncas possibilitescha quei in pei da taglia en cumparegliaziun moderat. Autras vischnauncas nezegian exact quellas resursas sco fontauna d’entradas. Era cheu ha la vischnaunca Ilanz/Glion cun ina cumpart da secundas habitaziuns da 36 pertschien la secund-bassa cefra dalla regiun.

Risguardond la cumparegliaziun regiunala vesa la suprastanza communal in alzament sin 1.5 promils sco giustificabel. Aschia stuess la populaziun en cumparegliaziun cun las vischnauncas vischinontas, cun excepziun da Falera, Laax e Schluein, aunc adina buca purtar mendras cundiziuns da taglia.

La tariffa da taglia nova vegness applicada l’emprema gada igl onn da taglia 2019.

Revisiun parziala dalla lescha da taglia

3. Taglia sin immobilias

Art. 5 Tarifa da taglia

La taglia sin immobilias importa **1.5** promils.

Tenor art. 35 lit. a dalla constituziun communal ei il parlament communal responsabels per midadas da leschas. Il referendum facultativ tenor art. 32 al. 1 lit. a resta resalvas.

Proposta

Sin fundament dallas explicaziuns precedentas fa la suprastanza communal suandontas propostas al parlament:

- ella fatschenta seigi d'entrar;
- la revisiun parziala dalla lescha da taglia dalla vischnaunca Ilanz/Glion seigi d'approbar.

Ilanz/Glion, igl 1. d'october 2018

Suprastanza communal Ilanz/Glion